

SIRI MENJELAJAH ALKITAB

PENGAJARAN ALKITAB

SUPAYA KAMU TERUS BERJUANG UNTUK
MEMPERTAHANKAN IMAN YANG TELAH
DIKURNIAKAN ALLAH KEPADA ORANG SALIH-NYA



WAWASAN
PENABUR

Siri Menjelajah Alkitab Pengajaran Alkitab

Penulis : Richard Bewes, Robert F. Hicks
Penterjemah : Lilian Jose
Penyunting : Martin H. Manser, Randy Singkee
Reka Letak : Randy Singkee
Kulit buku : Chiang Juat Chin

Edisi Bahasa Inggeris, *Bible Teaching* © 2009 oleh Creative 4 International, Bath, England.
Terjemahan Bahasa Malaysia © 2021 oleh Wawasan Penabur Sdn Bhd.

Buku ini diterbitkan berdasarkan lesen dari Creative 4 International, eksklusif untuk Wawasan Penabur Sdn Bhd.

Semua petikan Alkitab, kecuali dinyatakan sebaliknya, diambil dari:
Alkitab Versi Borneo © 2016, Borneo Sabda Limited

Cetakan Pertama: Januari 2021

Diterbitkan oleh:
Wawasan Penabur Sdn. Bhd.
P.O.Box: 8327, Kelana Jaya
46787 Petaling Jaya, Selangor
wawasan.penabur@gmail.com

Wawasan Penabur bekerja rapat dengan gereja-gereja berbahasa Malaysia untuk mengembang, menerbit dan menyebarkan bahan-bahan sumber Kristian dalam Bahasa Malaysia yang berasaskan Alkitabiah bagi kegunaan gereja dan umat Tuhan. Diilhamkan oleh pemimpin-pemimpin Kristian lintas-denominasi, Wawasan Penabur adalah satu organisasi bukan untuk keuntungan yang komited untuk melayani umat Kristian berbahasa Malaysia di Malaysia.

Tahukah anda bahawa anda boleh mendapatkan banyak bahan sumber Kristian dalam Bahasa Malaysia secara percuma online di Sabda Harian (<http://sabdaharian.com/>)?
Kunjungilah laman web mereka hari ini!

Hak Cipta terpelihara.

Tidak dibenarkan mengeluarkan mana-mana bahagian artikel, ilustrasi, dan isi kandungan buku ini dalam apa juga bentuk dan dengan cara apa juga sama ada secara elektronik, fotokopi, mekanik, rakaman atau cara lain sebelum mendapat izin bertulis daripada Penerbit.

Daftar Isi

1	Pengenalan
	1. Alkitab
4	1. Bahagian Utamanya
6	2. Inspirasinya
8	3. Tafsirannya
10	4. Aplikasinya
12	5. Tema Pusatnya
14	6. Isi kandungannya
16	Satu Renungan untuk Setiap Hari
	2. Allah
20	1. Tritunggal
22	2. Pencipta
24	3. Kewujudan Allah
26	4. Sifat-sifat Allah
28	5. Kebapaan Allah
30	6. Pernyataan Allah
32	Satu Renungan untuk Setiap Hari
	3. Yesus Kristus
36	1. Penjelmaan-Nya
38	2. Peristiwa Utama dalam Injil
40	3. Aspek Utama Pelayanan-Nya
42	4. Nama-nama-Nya
44	5. Kematian Penebusan-Nya
46	6. Kebangkitan Kemenangan-Nya
48	Satu Renungan untuk Setiap Hari
	4. Roh Kudus
52	1. Peribadi-Nya
54	2. Nama-nama dan Gambaran-Nya
56	3. Pekerjaan-Nya
58	4. Kegiatan-Nya dalam Diri Orang Kristian
60	5. Buah Roh
62	6. Kurnia-kurnia-Nya
64	Satu Renungan untuk Setiap Hari
	5. Manusia
68	1. Keunikan Kita
70	2. Kepelbagaian Kita
72	3. Pemberontakan dan Kejatuhan Kita
74	4. Pemberontakan dan Hukuman Kita
76	5. Usaha Pencarian dan Dilema Kita

-
- 78 6. Musuh-musuh Kita
80 **Satu Renungan untuk Setiap Hari**

6. Utusan-utusan Allah

- 84 1. Malaikat
86 2. Bapa Leluhur
88 3. Imam-imam
90 4. Nabi-nabi
92 5. Rasul-rasul
94 6. Penginjil
96 **Satu Renungan untuk Setiap Hari**

7. Penyelamatan

- 100 1. Rancangan Allah untuk Manusia Sejagat
102 2. Keperluan Manusia Sejagat untuk Penyelamatan
104 3. Jalan Penyelamatan
106 4. Penerimaan
108 5. Penyucian
110 6. Dalam Surat Kepada Jemaah di Roma
112 **Satu Renungan untuk Setiap Hari**

8. Orang Kristian

- 116 1. Siapakah Orang Kristian?
118 2. Orang Kristian dan Alkitab
120 3. Orang Kristian dan Doa
122 4. Orang Kristian dan Saksi
124 5. Orang Kristian dan Dunia
126 6. Kehidupan Kristian
128 **Satu Renungan untuk Setiap Hari**

9. Gereja

- 132 1. Ciri-cirinya
134 2. Huraian Utamanya
136 3. Hubungannya dengan Kristus
138 4. Kewibawaan dan Misinya
140 5. Tata Caranya
142 6. Pelayanan dan Ketertibannya
144 **Satu Renungan untuk Setiap Hari**

10. Akhir Zaman

- 148 1. Harapan Orang Kristian
150 2. Permulaan Kedatangan Kristus
152 3. Kedatangan Yesus
154 4. Penghakiman
156 5. Kebangkitan
158 6. Ketertiban Baru
160 **Satu Renungan untuk Setiap Hari**

Pengenalan

Bahan dalam buku ini disusun di bawah sepuluh doktrin asas Kristian atau subjek utama: Alkitab, Allah, Yesus Kristus, Roh Kudus, Manusia, Utusan-utusan Allah, Penyelamatan, Orang Kristian, Gereja dan Akhir Zaman. Setiap subjek utama dibahagikan kepada enam bahagian dan setiap bahagian mengandungi sehingga enam topik kajian. Sekiranya keseluruhan subjek ini diselesaikan dengan mempelajari satu topik setiap minggu, semua bahan akan meliputi dalam masa setahun. Setiap kajian terkandung dalam dua muka surat.

Bagaimana Memanfaatkan Bahan Pengajaran ini

Bahan pengajaran ini boleh digunakan untuk kajian peribadi atau sebagai sumber untuk membantu pengajaran Alkitab dalam satu kumpulan atau satu program gereja.

1. Kajian Peribadi

Bahan Pengajaran Alkitab ini boleh dijadikan sebagai satu rujukan Alkitab: sebagai sumber bagi kelas pengajian Alkitab mahupun kajian Alkitab secara peribadi.

2. Kajian Berkumpulan

Kumpulan-kumpulan pembelajaran (atau sel grup) dari semua peringkat umur akan mendapat manfaat daripada pengajaran yang mereka temukan semasa mengikuti panduan dalam kursus ini. Pemimpin kumpulan perlu bersedia dengan: membaca dan mengenali petikan yang disediakan, bersedia untuk menyokong mereka dengan rujukan; baca bahan-bahan pembelajaran yang disediakan; bersedia untuk bertanya soalan sebagai asas perbincangan dan menyediakan soalan-soalan lanjut sendiri.

3. Program Gereja

Para pendeta, pastor dan guru-guru pasti dibantu oleh bahan ini sewaktu mereka menyediakan program pemuridan untuk gereja. Tajuk-tajuk dalam buku ini telah ditulis khusus untuk membantu mereka mengajar kebenaran Alkitab dengan jelas. Ia juga boleh dijadikan sebagai bahan khutbah.

Sebelum Anda Bermula

1. Setiap kajian mempunyai **teks utama** yang memberikan gambaran menyeluruh teologi.
2. Teks **Kunci Kebenaran** merumuskan subjek tersebut.
3. **Rujukan Alkitab** akan memberi petikan atau ayat-ayat Alkitab yang berkaitan dengan teks utama.
4. **Catatan Tambahan** akan memberikan satu kesimpulan penting.
5. Bahagian **Kajian Alkitab** mempunyai banyak kegunaan, namun lebih sesuai digunakan untuk kumpulan belajar di rumah. Satu petikan Alkitab akan diberi, yang dipilih untuk menyampaikan penekanan utama pelajaran Alkitab, dengan soalan-soalan yang direka untuk memulakan perbincangan.
6. Bahagian **Fikirkan** direka untuk membantu anda untuk merenung dan memberi respons secara peribadi.
7. Seluruh bahagian ini diakhiri dengan **Renungan Harian** untuk setiap hari.

Selamat membaca!



A grayscale photograph of a person reading a book on a boat. The person's hands are visible, holding the book open. The background shows the water of the boat. The text '1' is centered above the title 'ALKITAB'.

1

ALKITAB

1. Bahagian Utamanya

PERJANJIAN LAMA

Sejarah

Kitab-kitab sejarah dalam Perjanjian Lama (dari Kejadian hingga Ester) menunjukkan bagaimana Allah terlibat dalam sejarah manusia. Dia menciptakan dunia, Dia memilih satu bangsa untuk melaksanakan rancangannya untuk menyelamatkan semua umat manusia dan Dia membekalkan mereka hukum untuk kehidupan yang benar. Kitab-kitab hukum dan kisah bangsa Israel menjadi asas untuk Kekristianan Perjanjian Baru.

Puisi dan Hikmat

Amsal, kiasan, teka-teki, lagu, perumpamaan dan alegori semuanya muncul dalam kitab-kitab hikmat dan puisi (dari Ayub hingga Kidung Agung). Kitab-kitab ini mencerminkan tindak balas manusia kepada Allah dan kehidupan. Kehampaan, kasih dan kebahagiaan; kekosongan hidup tanpa Allah; kepahitan, kemarahan dan kemenangan iman – setiap emosi dan situasi mempunyai tujuan dan hikmah apabila Allah berada di dalamnya.

Nubuat

Para nabi adalah orang yang dipanggil Allah sebagai penyampai pesanan kepada umat-Nya. Mereka menjelaskan masa lalu, mengingatkan umat tentang hukum Allah dan janji-janji-Nya; mereka mencabar kejahatan masa kini; mereka juga mengisytiharkan tindakan Allah di masa depan. Walaupun kesemua 17 kitab ini sering berbicara tentang penghakiman dan kebinasaan, mereka juga menceritakan harapan masa depan – kedatangan Mesias dan hubungan baharu dengan Allah.

PERJANJIAN BARU

Sejarah

Empat Injil didasarkan pada catatan saksi-saksi mata yang mendengar dan melihat Yesus dari Nazaret. Mereka mengenali-Nya sebagai Mesias yang menggenapi Perjanjian Lama.

Kitab Kisah Para Rasul meneruskan cerita yang berlaku selepas kematian dan kebangkitan Yesus, serta bagaimana gereja Kristian bertumbuh di dalam dunia Yahudi dan bukan Yahudi.

Surat-Surat

Surat-surat Perjanjian Baru ditulis kepada individu, gereja atau sekumpulan gereja. Mereka memberikan pembaca gambaran yang jelas mengenai kehidupan dan masalah yang dihadapi oleh orang Kristian terawal.

Surat-surat ini sering menunjukkan kepada kita kesilapan mereka serta ajaran para rasul yang memberikan pembetulan dan bimbingan dalam kehidupan Kristian. Kerana orang Kristian masih mempunyai keperluan dan kelemahan yang sama, 21 surat dalam Perjanjian Baru tetap relevan bagi gereja di setiap zaman.

Nubuat

Kitab terakhir dalam Alkitab terdiri dari satu siri penglihatan yang dilihat oleh rasul Yohanes. Ia mengungkapkan keadaan yang mempengaruhi orang percaya, orang tidak percaya dan seluruh tatanan yang diciptakan.

Kitab Wahyu ditulis dalam bahasa simbol dan nubuatan. Ia telah mengaspirasikan orang Kristian sepanjang zaman dengan mesej Allah yang mengawal sejarah dan yang akhirnya akan mengalahkan semua kuasa kejahatan.



Rujukan Alkitab

PERJANJIAN LAMA

Sejarah:

Kejadian 12:1-3; Yosua 24:14-15

Puisi dan Hikmat:

Mazmur 127; Pengkhotbah 3:1-9

Nubuat:

Amos 5:21-24; Yesaya 53

PERJANJIAN BARU

Sejarah:

Markus 1:14-15; Yohanes 20:30-31;

Kisah Para Rasul 1:1-3

Surat-Surat:

Roma 12:1-2; Titus 3:3-8; 1 Petrus 2:9

Nubuat:

Wahyu 1:8-11; 12:7-12; 22:12-13



Kunci Kebenaran

Terdapat 66 buah kitab, yang dikumpulkan dalam dua “perpustakaan”. Kitab-kitab ini ditulis dalam jangka masa 1,500 tahun. Kitab-kitab ini dibahagikan kepada enam bahagian dalam pembelajaran ini.



Catatan Tambahan

Salah satu perkara yang luar biasa tentang Alkitab ialah walaupun Alkitab adalah sebuah kitab yang sangat tua, yang ditulis untuk membimbing manusia dalam kehidupan mereka berabad-abad yang lalu, namun ia masih dapat memberi jawapan kepada keperluan manusia pada hari ini.



Kajian Alkitab Mazmur 119:1-32

Sama ada dalam kumpulan kecil, sel grup, kumpulan pelajar atau bersendirian, gunakan soalan berikut untuk membantu anda dalam kajian petikan ini.

1. Pengkhotbah Baptis yang terkenal, C.H. Spurgeon menggambarkan Mazmur 119 sebagai "lautan api". Semasa anda membaca ayat-ayat ini, tanyalah diri anda apakah perkara yang ada di dalamnya yang menimbulkan reaksi ini?
2. Anda pasti mendapati setiap ayat mempunyai beberapa rujukan kepada Firman Allah: hukum, peraturan, ajaran, ketetapan dan sebagainya. Apa yang dapat dipelajari tentang sifat firman Allah dari istilah-istilah yang berbeza ini?
3. Walaupun Mazmur 119 tidak mempunyai tajuk, gayanya menunjukkan ia ditulis oleh Daud, budak gembala yang menjadi raja Israel. Bolehkah anda mengenal pasti ayat-ayat dalam petikan ini yang mempunyai kaitan dengan episod dalam kehidupan Daud? Sebagai contoh, lihat ayat 9,14,19,23-24,28.
4. Apakah yang boleh kita pelajari dari ayat 18 tentang sikap kita terhadap hukum Allah? Kenapakah mata kita perlu “dibuka”?
5. “Merenung” (ayat 23). 250 tahun yang lalu, seorang pengkhotbah dari Yorkshire, William Grimshaw, mendefinisikan merenung sebagai “mengunyah jiwa”. Bagaimanakah hal ini dapat dilakukan dengan firman Allah?
6. Sewaktu Mazmur ditulis, Perjanjian Baru belum wujud. Rujuk Galatia 3:29. Apakah yang boleh kita pelajari mengenai hubungan Perjanjian Lama dan Perjanjian Baru?
7. Kenalpasti empat keputusan peribadi pemazmur dalam ayat 30-32. Kesemua mereka adalah aktif. Bagaimanakah anda boleh mengamalkannya? Luangkan waktu sekarang dalam doa dan penerapan peribadi mazmur yang hebat ini.



Fikirkan

- A. Baca Lukas 24:13-35. Apakah yang kita pelajari tentang kuasa Alkitab untuk menghapuskan ketakutan dan membantu pemahaman? Perhatikan jumlah bahagian dalam Perjanjian Lama yang dirujuk dalam ayat 27 dan 44.
- B. Walaupun seluruh Kitab Suci diilhamkan oleh Allah, beberapa kitab mungkin adalah lebih penting daripada yang lain. Pada pendapat anda, apakah contoh kitab itu dari Perjanjian Lama dan Perjanjian Baru?
- C. Baca 2 Timotius 3:16-17. Mengapakah Allah memberikan kita Alkitab?
- D. Baca Galatia 3:29. Apakah yang kita pelajari tentang hubungan Perjanjian Lama dan Perjanjian Baru?

Alkitab 2. Inspirasinya

Identiti Penulis Ilahinya

Alkitab mendakwa bahawa Allah adalah penulis utamanya. Keyakinan bahawa Allah berbicara melalui mesej-mesej Perjanjian Lama dinyatakan ratusan kali.

Kedua-dua orang Yahudi dan penulis Perjanjian Baru menerima bahawa Perjanjian Lama telah diilhamkan oleh Allah. Yesus sendiri menyokong pandangan ini. Dia percaya Kitab Suci, dan dengan cara Dia memetikinya menunjukkan bahawa ia lebih penting daripada pendapat dan tradisi manusia.

Para penulis Perjanjian Baru turut sedar mereka tidak mengajar kebijaksanaan manusia, melainkan mesej Allah kepada manusia sejagat.

Kepelbagaian Penulis Manusianya

Penulis Alkitabiah datang dari pelbagai budaya dan era, serta mewakili pelbagai julat intelek dan kemampuan yang sangat luas.

Terdapat kepelbagaian keadaan. Ada yang menulis sebagai tahanan dalam buangan, manakala yang lain sebagai pemerintah kerajaan. Terdapat kepelbagaian pekerjaan. Ada yang merupakan tukang roti biasa, gembala atau pembuat khemah, sementara yang lain menikmati kedudukan yang tinggi dalam masyarakat. Ada kepelbagaian watak – dari yang berputus asa kepada yang gembira.

Kesatuan Temanya yang Banyak

Perpustakaan buku yang unik ini menghadapkan pembaca dengan kesatuannya, walaupun ditulis dalam jangka masa lebih kurang 1,500 tahun. Ia adalah purba, namun moden dalam kaitannya dengan keperluan manusia. Ia adalah pelbagai, namun satu – disatukan oleh tema umum umat Allah dan keinginan serta keperluan mereka untuk kedatangan seorang Penyelamat. Perjanjian Lama digenapi oleh Perjanjian Baru. Perjanjian Baru berakar dalam Perjanjian Lama. Perpustakaan itu adalah satu.

Kewibawaan Kebenaran yang Diilhamkan

Sejak dahulu lagi nilai kitab-kitab ini sangat mengagumkan umat Allah kerana mereka mengakui kewibawaannya, dan menerima mereka ke dalam kategori Kitab Suci yang diilhamkan. Mereka menyedari bahawa itu adalah Allah yang berbicara.

Bukan penjilidan kitab-kitab ke dalam Alkitab yang menjadikannya diilhamkan. Ini sudah mereka miliki. Kewibawaan Perjanjian Lama telah diiktiraf oleh orang Yahudi, oleh Yesus sendiri dan oleh para penulis Perjanjian Baru, yang sering memetik Perjanjian Lama. Tulisan-tulisan Perjanjian Baru juga diterima oleh gereja sejak dari awal sebagai mempunyai kata akhir dalam semua yang diyakini oleh orang Kristian.

Realiti Impak Moralnya

Alkitab tidak gentar untuk menggambarkan kejahatan secara jujur, walaupun beberapa tokoh terbaiknya terlibat di dalamnya. Tetapi sebaliknya, ia turut menunjukkan kepada kita piawaiian moral tertinggi dalam sejarah – kehidupan Yesus Kristus.

Ini adalah kitab yang secara konsisten mencabar kejahatan, mengubah hidup dan meninggikan Kristus.



Rujukan Alkitab

Identiti:

Yeremia 1:9; 2 Petrus 1:21;
2 Timotius 3:16-17

Kepelbagaian:

Amos 7:14-15;
1 Raja-Raja 4:29-32;
Kisah Para Rasul 18:3

Kesatuan: Matius 5:17-18;
Lukas 24:25-27,44

Kewibawaan: Yosua 1:7-8;
Matius 22:29; Mazmur 19:7-11

Realiti: Ulangan 32:45-47;
Ibrani 4:12



Kunci Kebenaran

Sewaktu kita mengatakan bahawa Alkitab “diilhamkan,” kita bermaksud Allah telah menyampaikan mesej-Nya melalui orang yang dipilih-Nya. Orang ini tidak menjadi seperti robot di bawah kawalan Allah, tetapi menjaga identiti mereka sendiri, sambil dipandu oleh Allah.



Catatan Tambahan

Seperti buku-buku lain, Alkitab ditulis oleh manusia. Tetapi tidak seperti buku lain, ia dibimbing dan dirancang oleh Allah dari awal hingga akhir. Ini kerana Allah berdiri di sebalik Alkitab, bahawa semua orang Kristian berhutang kesetiaan dan ketaatan kepada tuntutan-Nya.



Kajian Alkitab 2 Timotius 3:10-4:8

Rasul Paulus mendorong perantisnya Timotius untuk meyakini firman Allah dalam pelayanannya meskipun berdepan dengan kesukaran dan tentangan. Soalan-soalan berikut akan membantu dalam kajian petikan ini:

1. Renungkan penentangan yang diundang oleh pengajaran setia firman Allah (ayat 10-13). Mengapakah ini terjadi? Apakah kaitannya dengan fokus utama Firman Allah (Yohanes 5:39-40)?
2. Baca ayat 14 dan 15. Bagaimana dan bilakah anda pertama kali diperkenalkan kepada Alkitab? Bandingkan pengalaman.
3. Apakah yang secara unik Alkitab lakukan untuk kita? Rujuk ayat 15-17.
4. “Hembusan nafas Allah”, “diilhamkan oleh Allah” (ayat 16). Bagaimanakah “inspirasi” Alkitab berbeza daripada “inspirasi” karya-karya yang lain, contohnya karya Shakespeare? Bandingkan Lukas 24:27 dan 2 Petrus 1:21.
5. Pertimbangkan tanggungjawab yang serius untuk menyampaikan “firman” kepada orang lain (4:1-2). Apakah motivasi dan sikap yang patut kita ada?
6. Apa yang kita hadapi dalam mengisytiharkan wahyu Allah (4:3-4)? Dalam cara apa anda melihat kecenderungan ini bekerja pada hari ini?
7. Ada empat perintah langsung yang diberikan kepada Timotius dalam 4:5. Bagaimanakah mereka diterapkan kepada kebenaran Allah dalam dunia moden hari ini? Apakah dorongan bagi kita dari kata-kata Paulus dalam ayat 6-8? Akhiri pembelajaran ini dengan berdoa untuk orang yang anda kenal, di seluruh dunia, yang terlibat dalam menyebarkan mesej Allah.



Fikirkan

- A. Baca Keluaran 3:1-14 dan 4:1-17. Kenapakah Musa keberatan untuk bercakap bagi Allah? Mengapakah Allah mempercayainya?
- B. Apabila para nabi menyampaikan mesej Allah, mereka sering diserang atau dibunuh. Mengapa? Adakah ia masih berlaku pada hari ini?
- C. Apakah pandangan Yesus tentang Kitab Suci? Rujuk Matius 5:17-19. Bagaimanakah kita dapat belajar dari teladan Yesus?
- D. Allah berbicara melalui para penulis Alkitab tanpa merampas keperibadian mereka. Pertimbangkan beberapa daripada penulis ini. Apakah yang kita pelajari tentang cara Allah menggunakan orang?

Alkitab

3. Tafsirannya

Alkitab Haruslah:

Dilihat dalam Latar Belakang Sejarah

Salah satu cara untuk kita memahami makna satu petikan Alkitab ialah untuk mendapatkan pemahaman makna asalnya kepada pembaca awal. Semakin kita celik tentang adat dan politik zaman Alkitab, maknanya juga akan menjadi semakin jelas.

Sebagai contoh, Perjanjian Baru memerintahkan supaya para hamba mematuhi tuan mereka. Kita harus memahami ini berdasarkan fakta bahawa perhambaan secara amnya diterima pada ketika itu (walaupun ia dilihat sebagai sebahagian daripada perintah yang telah berlalu kerana Kristus).

Begitu juga satu pengetahuan tentang adat resam pada masa itu akan membantu pembaca moden memahami perintah Yesus kepada para pengikut-Nya untuk membasuh kaki satu sama lain – yang mungkin kelihatan tidak relevan pada hari ini.

Konsisten dengan Petikan Sekitarnya

Kita lebih memahami maksud perkataan Alkitab apabila kita mengkaji konteksnya. Dengan cara yang sama, kita hanya boleh benar-benar memahami satu ayat dengan melihat perenggan di sekitarnya.

Banyak pemimpin pelbagai kultus dan ajaran sesat sering memutar belit maksud Alkitab dengan mengambil kalimat di luar konteksnya. Dengan cara ini, mereka menggunakan Alkitab untuk menyokong ajaran mereka. Orang Kristian harus berhati-hati untuk mengetahui apa yang sebenarnya dikatakan oleh Alkitab - walaupun ia menyakitkan.

Tidak Bercanggah dengan Seluruh Alkitab

Sebarang petikan harus ditafsirkan dalam terang seluruh Alkitab. Apabila ini dilakukan, tidak ada satu pun dari Kitab Suci yang akan bercanggah dengan yang lain. Apabila kita berhadapan dengan percanggahan yang jelas dalam Alkitab, itu mungkin kerana kita tidak mengetahui ajaran Alkitab yang konsisten secara menyeluruh.

Cabaran bagi pembaca Alkitab adalah untuk mengembangkan satu pemikiran yang benar-benar alkitabiah.

Konsisten dengan Matlamat Wahyu Allah

Alkitab memberitahu kita semua bahawa kita perlu mengetahui rancangan Allah untuk ciptaan-Nya serta umat manusia. Ada banyak soalan yang kita ingin dijawab, tetapi mungkin tidak dijawab oleh Alkitab. Tetapi firman Allah memberitahu kita semua perkara yang perlu kita ketahui tentang diri-Nya dan rancangan-Nya.

Kita harus sedar bahawa Alkitab adalah sebuah kitab penyelamatan. Oleh itu, kita harus menghindari membuat tafsiran pintar mengenai hal-hal di luar tujuan utamanya.

Difahami dalam Perubahan Budaya

Alkitab mempunyai mesej yang hidup, dengan kuasa untuk mengubah kehidupan dan karakter seseorang. Walaupun ia diberikan dalam budaya yang asing dan jauh dari zaman moden, ia tetap boleh diterapkan pada kehidupan hari ini.

Bagaimanapun, sewaktu kita mentafsir Alkitab, kita harus bersedia untuk berdepan dengan kata-kata dan istilah-istilah yang digunakan oleh penulis alkitabiah, dan menterjemahkannya dengan cara yang dapat difahami oleh pembaca moden.



Rujukan Alkitab

Dilihat:

Efesus 6:5; Yohanes 13:14

Konsisten:

Nehemia 8:8; 2 Korintus 4:2

Tidak bercanggah:

Matius 22:29; 2 Timotius 2:15

Konsisten:

Ulangan 29:29; 2 Timotius 3:14-15

Difahami:

Kisah Para Rasul 8:34-38;

Kisah Para Rasul 17:11



Kunci Kebenaran

Tafsiran bermaksud penemuan maksud sebenar Alkitab. Ada beberapa perkara penting yang harus diingati sewaktu kita cuba memahami pengajaran Alkitab.



Catatan Tambahan

Alkitab bukan sebuah buku teks saintifik atau buku sejarah. Namun ia tidak bercanggah dengan penemuan saintifik atau fakta sejarah. Tujuannya adalah berbeza, iaitu menyampaikan rancangan Allah bagi umat manusia, dalam Kristus.



Kajian Alkitab Nehemia 8:1-12

Berikut adalah petikan yang menggambarkan umat Allah zaman dahulu, orang Yahudi pada kurun ke-5 Sebelum Masihi. Mereka baru sahaja dipulihkan dari hari-hari yang dahsyat semasa pembuangan di Babel. Walaupun sekarang di bawah pemerintahan Persia, mereka mempunyai peluang bukan saja untuk memulihkan tembok-tembok Yerusalem yang hancur, tetapi juga membina semua kehidupan mereka – di sekitar Kitab Suci. Tumpukan sekarang pada soalan-soalan berikut:

1. “Kitab Suci Taurat” (ayat 1) mungkin merujuk pada kitab Ulangan. Apakah kelebihan mengkaji Kitab Suci bersama?
2. Bayangkan keadaan dalam ayat 1-6. Ini adalah satu peristiwa kebangsaan. Sejauh manakah mesej Alkitab telah memberikan dasar kepada ketamadunan moden?
3. Kaji kunci keseluruhan bab ini (ayat 8) dan bincangkan kepentingan perkataan seperti “jelas”, “makna” dan “difahami”.
4. Mengapakah ia tidak memuaskan apabila banyak “makna” yang berbeza dipaksa ke satu petikan? (Bandingkan 2 Korintus 4:2). Apakah yang terjadi apabila hanya tafsiran benar yang disampaikan kepada para pendengar Ezra (ayat 9,12)?
5. Berdasarkan petikan ini, pertimbangkan reaksi orang lain apabila mesej Allah disampaikan dengan jelas kepada mereka (misalnya Yeremia 15:16; 1 Tesalonika 1:6).
6. Kitab Suci sentiasa memberi amaran tentang guru-guru palsu yang menggunakan Alkitab secara salah (misalnya 2 Timotius 3:6-8; 2 Petrus 2:1-3). Sejauh manakah ini menjadi masalah dalam masyarakat anda?
7. Lihat ayat 5: Ezra membuka buku itu. Apakah azam anda sewaktu mempelajari petikan ini? Berdoalah tentangnya sekarang. Jadikan 2 Timotius 2:15 sebagai moto anda.



Fikirkan

- A. Baca Yohanes 13:1-15. Pada zaman Yesus, untuk membasuh kaki orang lain adalah suatu tindakan kerendahan diri dan kebaikan. Bagaimanakah kita dapat menerapkan arahan Yesus dalam ayat 14 pada hari ini?
- B. Beberapa perkataan yang digunakan dalam terjemahan Alkitab bukan sebahagian daripada ucapan seharian. Cari tahu erti kata-kata seperti “penyelamatan” atau “pertaubatan,” kemudian jelaskan dengan menggunakan kata-kata anda sendiri.
- C. Apakah reaksi kita apabila mengetahui umat Kristian berpecah akibat tafsiran satu petikan Alkitab?
- D. Apakah kelebihan dan kekurangan mengetahui ayat-ayat Alkitab dengan menghafal?

Alkitab

4. Aplikasinya

Baca dengan Berdoa

Alkitab bukan sekadar sebuah buku yang menarik untuk dibaca; ia adalah sebuah buku untuk kita terlibat. Ia menangani isu-isu yang berkaitan dengan kehidupan, watak dan nasib pembaca.

Untuk membaca Alkitab dengan berdoa adalah bergantung kepada Roh Kudus bagi melindungi anda daripada kekerasan hati atau kesombongan. Ia juga menunjukkan bahawa pembaca sanggup mematuhi perintah moral Allah.

Dengar Secara Peribadi

Alkitab bukan sebuah buku falsafah abstrak – ia adalah sebuah buku mengenai kehidupan dan tentang manusia dalam situasi sebenar. Yesaya bercakap secara khusus kepada penduduk Yerusalem. Rasul Paulus sering menyapa kawan-kawannya dengan nama dalam suratnya. Kitab Wahyu ditulis kepada orang Kristian yang sedang menderita penindasan.

Tetapi kita mesti terus menyatakan bahawa ganjaran dan janji Alkitab adalah untuk setiap pembaca, dari abad apapun. Sewaktu kita membuka kehidupan kita kepada mesej Alkitab, Allah akan berkomunikasi dengan kita.

Lihat dengan Harapan

Semasa kita membaca Alkitab, kita pasti terperanjat dengan beberapa peristiwa yang bertindak sebagai amaran. Pasti ada petikan yang mencabar atau membingungkan kita. Kita harus bersedia untuk dicabar sepenuhnya oleh buku ini.

Terapkan Secara Teratur

Apabila kita membaca dan menerapkan Alkitab, salah satu manfaatnya yang besar ialah kita mulai melihat dunia dengan cara Kristian. Kita juga melihat Alkitab secara keseluruhan dan bukan sebagai fragmen yang tidak berkaitan.

Seperti kanak-kanak yang memerlukan makanan untuk pertumbuhan yang sepatutnya, orang Kristian juga memerlukan makanan rohani dengan membaca Alkitab dan menerapkan kebenarannya setiap hari. Hasilnya, watak kita akan berubah.

Bertindak dengan Ketaatan

Orang Kristian akan sentiasa dicabar dengan perintah Alkitab. Alkitab mencabar kita untuk mematuhi firman Allah, dan bukan hanya mendengarkan.

Yesus berkata mendengar sahaja tidak mencukupi. Kehidupan kita hanya akan selamat dan terjamin – seperti rumah yang dibina di atas batu – apabila kita mendengar dan mematuhi perintah-Nya.

Baca Sepenuhnya

Pembaca Alkitab harus menghargai semua yang diajarkan Alkitab tentang topik apa pun. Untuk bergantung pada ayat-ayat atau petikan kegemaran saja (meskipun bermanfaat), tidak akan mematangkan kerohanian kita.

Sewaktu kita membaca Alkitab secara menyeluruh, ibadah akan menjadi satu kuasa hidup, bakti kita kepada Allah menjadi satu aktiviti yang penting dan Kristus menjadi teman seharian.



Rujukan Alkitab

Baca:

Mazmur 119:33-40; Matius 7:7-8

Dengar:

1 Samuel 3:10; Wahyu 1:3

Lihat:

Yeremia 23:29; 1 Yohanes 5:13

Terapkan:

Mazmur 1:1-2; 1 Petrus 2:2-3

Bertindak:

Yakobus 1:22-25; Matius 7:24-27

Baca:

2 Korintus 4:2; Kolose 3:16



Kunci Kebenaran

Alkitab dimaksudkan untuk mengubah cara hidup kita. Ketika kita menerapkan Alkitab, Allah memerintahkan, menyokong, menyucikan dan mengarahkan kita dalam kehidupan seharian kita.



Catatan Tambahan

Allah memberi kita Alkitab, bukan hanya untuk kita menikmati cerita-cerita atau belajar tentang-Nya. Dia memberi kita Alkitab supaya kita dapat hidup mengikuti kehendak-Nya. Menerapkan Alkitab mungkin mencabar dan tidak menyelesaikan – tetapi ia harus dilakukan.



Kajian Alkitab

Yakobus 1:19-27

Ada baiknya untuk kita memahami mesej Alkitab, tetapi adakah ia diamalkan? Inilah tema utama surat Yakobus, saudara Yesus Kristus (Matius 13:55). Surat ini ditujukan kepada umat Allah secara amnya, dan mempunyai kaitan untuk sepanjang zaman. Soalan-soalan berikut akan membantu kita memahaminya.

1. Apakah kalimat dalam ayat ini yang paling jelas merangkumkannya?
2. Apakah sikap yang patut kita amalkan sewaktu kita datang kepada firman Allah?
3. Kenapakah sekadar mendengar saja dianggap sebagai tindakan menipu diri sendiri (ayat 22)? Bandingkan penemuan anda dengan Matius 7:26-27.
4. Renungkan ungkapan “firman yang disemaikan-Nya ke dalam hatimu” (ayat 21). Apakah maksudnya? Bagaimanakah ia terjadi? Renungkan perumpamaan penabur (Lukas 8, misalnya ayat 15).
5. Apakah maksud ilustrasi dalam ayat 23-25? Bagaimanakah anda akan menerapkan ini untuk tindakan anda sendiri?
6. Ayat 26 dan 27 menimbulkan satu persoalan tentang cara kita membaca firman Allah; bagaimanakah ia telah mengubah hidup kita? Ini berlaku kepada kata-kata dan yang kita ucapkan, dan perkara-perkara yang sedang kita lakukan. Dari ayat-ayat ini, jelaskan agama yang nyata di dunia sekarang ini.
7. Adakah sudah tiba masa untuk anda menghafal ayat Alkitab selepas membaca petikan ini? Sebelum anda berdoa, rujuk Yosua 1:8 ... rujukan, kata-kata, kemudian rujukan lagi, untuk memastikannya bertahan!



Fikirkan

- A. Baca Mazmur 119:97-112. Cuba senaraikan beberapa manfaat dari merenung Kitab Suci.
- B. Kristus pernah menceritakan perumpamaan tentang jenis-jenis tanah di mana benih yang baik jatuh (Markus 4:1-20). Cuba gambarkan kehidupan “tanah yang baik”, di mana benih firman Allah dapat bertumbuh.
- C. Bincang dengan rakan-rakan anda secara praktikal tentang waktu paling sesuai untuk anda membaca Alkitab.
- D. Ibrani 4:12 menggambarkan kuasa Kitab Suci. Cuba senaraikan beberapa contoh dalam Alkitab di mana kuasa ini ditunjukkan.

5. Tema Utamanya

Konflik Berterusan

Konflik dalam Alkitab bermula apabila Adam dan Hawa mempersoalkan kewibawaan Allah. Dari permulaan yang mudah ini telah mengundang dosa ke dunia, dan pemberontakan umat manusia terhadap pemerintahan Allah. Alkitab menjejaki penyebaran konflik ini antara manusia dan Allah. Ia menunjukkan bagaimana manusia menjadi bermusuhan satu sama lain, dan juga kepada Allah. Keperluan umat manusia didamaikan kepada Allah menjadi tema utama Alkitab.

Penyelamat yang Dijanjikan

Perjanjian Lama menyatakan dengan jelas tentang kerinduan untuk seorang Penyelamat yang akan membebaskan manusia dari dosa dan kebersalahan. Walau bagaimanapun, ia bukan sekadar harapan. Para nabi terutamanya, bercakap mengenai janji Allah tentang seorang Penyelamat yang akan mengadakan satu perjanjian baru dengan umat Allah – melalui pengampunan dan pelayanan-Nya.

Perjanjian Baru menunjukkan dengan jelas kepada Yesus Kristus sebagai Penyelamat yang dijanjikan ini.

Pekerjaan Kristus

Kedatangan Yesus Kristus dalam sejarah menggenapi semua harapan Perjanjian Lama dan menjadi asas untuk perjanjian yang baru. Di dalam Yesus, Allah sendiri memasuki sejarah manusia dan membuka jalan kepada pengampunan serta kehidupan kudus. Semua ini dicapai melalui kematian dan kebangkitan Kristus serta pemberian Roh-Nya. Kematian telah dikalahkan, kuasa Iblis dipatahkan dan Kristus yang telah bangkit kini memerintah.

Komuniti Baru

Perjanjian Baru menggambarkan pengikut Kristus sebagai komuniti yang diselamatkan - dipanggil untuk menjadi ahli gereja sejagat-Nya. Di mana sahaja pemerintahan Kristus beroperasi di dalam kehidupan umat Kristian, di sanalah gereja-Nya boleh ditemui.

Komuniti baru ini menyembah Tuhannya yang memerintah, dan dipanggil untuk memenuhi misi penginjilan serta pelayanan praktikalnya ke seluruh dunia. Yesus Kristus sendiri meneguhkannya. Apabila Dia datang kembali, keahlian dan tugas gereja akan selesai.

Kemenangan Muktamad

Seluruh ciptaan akan terlibat dalam kemenangan terakhir Allah. Kasih dan keadilan-Nya akan ditegakkan untuk semua orang melihat. Seluruh kerajaan kejahatan akan digulingkan.

Tanda penting masa depan adalah kembalinya Yesus Kristus. Dia akan kembali secara peribadi, secara sejarah, jelas kelihatan dan penuh kemenangan. Dia akan datang sebagai Hakim seluruh dunia dan Penyelamat bagi umat-Nya. Tarikh kepulangan-Nya tidak dapat diramalkan, walaupun bencana, peperangan dan kemunculan Kristus palsu mengesahkan peristiwa akhir ini semakin hampir.

Orang Kristian yang percaya menantikan syurga dan bumi baru. Mereka menantikan hari apabila mereka akan menerima tubuh yang baru yang tidak akan musnah. Dosa dan kesedihan akan dihapuskan, dan penyelamatan mereka akan lengkap.



Rujukan Alkitab

Konflik:

Kejadian 3; Titus 3:3

Penyelamat:

Yesaya 53; Yeremia 31:31-34;

Lukas 24:44-45

Pekerjaan:

Markus 1:15; Lukas 2:28-32;

Titus 3:4-7

Komuniti:

Matius 16:18; 28:19-20;

Efesus 2:18-22

Kemenangan:

1 Tesalonika 4:13-18; Wahyu 21:1-4



Kunci Kebenaran

Walaupun manusia telah memberontak terhadap Allah dan mengingkari hukum-Nya, Allah mempunyai rancangan untuk menyelamatkan kita. Rancangan ini tertumpu pada Yesus Kristus dan berakhir dengan kemenangan Allah ke atas dosa, Iblis dan kematian.



Catatan Tambahan

Adalah penting bagi pembaca Alkitab untuk memahami, membaca seluruh Alkitab secara konsisten, bahawa Allah adalah pusat bagi segalanya dan berada dalam kawalan mutlak alam semesta.



Kajian Alkitab Wahyu 5:1-14

Ditulis sekitar tahun 95 Masihi, menjelang akhir pemerintahan Maharaja Domitian, kitab Wahyu memberikan umat Allah yang ditindas dari setiap generasi dengan satu siri penglihatan yang diberikan kepada rasul Yohanes yang dibuang. Dalam petikan ini, tema segala zaman dinyatakan kepada kita. Gunakan soalan-soalan berikut untuk membantu kajian ini:

1. “Gulungan” dalam penglihatan Yohanes bukanlah Kitab Suci, tetapi rahsia, penjelasan dari semua sejarah dan maknanya. Bolehkah anda memikirkan sesiapa yang mendakwa diri mereka sebagai guru seluruh dunia?
2. “Aku pun menangis teresak-esak” (ayat 4). Kenapakah para pemimpin dan gerakan hebat ini gagal menguraikan makna kehidupan? Bandingkan penemuan anda dengan Daniel 2:27-28.
3. Satu-satunya calon yang berjaya akhirnya diumumkan (ayat 5). Apakah keistimewaan gelarannya? Rujuk Yesaya 9:6-7; 11:1-2. Siapakah tokoh ini?
4. Apakah signifikan pemimpin diraja ini yang berubah menjadi Anak Domba yang telah disembelih (ayat 6,7)? Kejadian 22:8, Keluaran 12:21-23 dan 1 Korintus 5:7-8 akan membantu.
5. Bincangkan dari ayat 8-10, tema penebusan Kristus di dunia. Bilakah anda mula-mula sedar tentang perkara ini?
6. Sekarang giliran para malaikat untuk menyanyi (ayat 11,12). Apakah yang kita pelajari tentang kedudukan Yesus Kristus?
7. Ayat 13,14. Adakah lagu sejagat ini lagu anda? Apakah maksud petikan ini bagi pandangan anda sendiri?



Fikirkan

- A. Pertimbangkan Titus 3:3-7. Sejauh mana tema-tema utama Alkitab dirumuskan dalam petikan ini? Adakah kata-kata Paulus sepadan dengan pengalaman anda?
- B. Seorang Cina pernah berkata tentang Alkitab, “Penulis buku inilah pencipta saya.” Adakah anda bersetuju dengannya? Apakah maksud di sebalik kalimat tersebut?
- C. Apakah sebab yang paling penting untuk memiliki cara alkitabiah dalam memandang kehidupan? Kerana Alkitab memberi kelegaan dan harapan? Kerana masyarakat memerlukan sesuatu untuk dipercayai? Kerana Alkitab itu benar? Berikan alasan anda.
- D. Bagaimanakah satu pandangan alkitabiah tentang kehidupan membantu seseorang berdepan dengan isu kejahatan, perselisihan dan ketidakadilan?

Alkitab

6. Isi kandungannya

PERJANJIAN LAMA

Kejadian Permulaan rancangan Allah untuk umat-Nya.

Keluaran Umat Allah dibebaskan dari perhambaan.

Imamat Menyediakan umat Allah untuk ibadah.

Bilangan Umat Allah berkeliaran di gurun.

Ulangan Umat Allah dipanggil untuk taat.

Yosua Kejayaan di Tanah yang Dijanjikan.

Hakim-Hakim Kegagalan di Tanah yang Dijanjikan.

Rut Kisah seorang menantu yang setia.

1 Samuel Kemunculan Israel sebagai sebuah kerajaan.

2 Samuel Raja terunggul Israel, Daud.

1 Raja-Raja Salomo – Bait Suci – perpecahan.

2 Raja-Raja Kerajaan terbahagi dan para nabi.

1 Tawarikh Kesetiaan Allah kepada umat-Nya.

2 Tawarikh Kejatuhan Israel sebagai satu bangsa.

Ezra Kepulangan dari pembuangan dan permulaan yang baru.

Nehemia Bahaya sewaktu Yerusalem dibina semula.

Ester Keberanian Ester menyelamatkan orang Yahudi yang dibuang.

Ayub Dialog tentang penderitaan seorang yang salih.

Mazmur Respons jujur manusia kepada Allah.

Amsal Hikmat untuk hidup.

Pengkhotbah Dunia falsafah didedahkan.

Kidung Agung Puisi cinta.

Yesaya Nabi harapan.

Yeremia Nabi tragedi.

Ratapan Nabi kesedihan.

Yehezkiel Nabi kemuliaan Allah.

Daniel Nabi yang percaya kepada Allah.

Hosea Nabi cinta.

Yoel Nabi Hari TUHAN.

Amos Nabi keadilan.

Obaja Nabi malapetaka.

Yunus Nabi pertaubatan.

Mikha Nabi pengembalian.

Nahum Nabi pembalasan.

Habakuk Nabi keraguan dan iman.

Zefanya Nabi penghakiman.

Hagai Nabi pengabdian

Zakharia Nabi pemulihan.

Maleakhi Nabi harapan.

PERJANJIAN BARU

Matius Pengajaran Mesias yang dijanjikan.

Markus Pekerjaan Penyelamat yang berkuasa.

Lukas Kebimbangan seorang Penyelamat yang penyayang.

Yohanes Kepercayaan terhadap Penyelamat peribadi.

Kisah Para Rasul Saksi kepada Penyelamat yang bangkit.

Roma Kebenaran Allah ditegakkan dan diterapkan.

1 Korintus Masalah sebuah gereja diperbetulkan.

2 Korintus Pelayanan gereja.

Galatia Injil dan hukum Yahudi dibandingkan.

Efesus Hubungan Kristus dengan gereja.

Filipi Kasih dan kesetiaan sebuah gereja.

Kolose Peribadi Yesus ditinggikan.

1 Tesalonika Orang baru percaya didorong.

2 Tesalonika Kedatangan kedua Yesus.

1 Timotius Arahan untuk kelakuan gereja.

2 Timotius Pastor gereja didorong.

Titus Kawalan diri orang Kristian.

Filemon Kepada pemilik hamba yang melarikan diri.

Ibrani Kebesaran Kristus ditinggikan.

Yakobus Arahan praktikal untuk iman yang hidup.

1 Petrus Penderitaan gereja dijelaskan.

2 Petrus Bahaya gereja dinubuatkan.

1 Yohanes Realiti persekutuan ilahi.

2 Yohanes Berjalan dalam kebenaran digalakkan.

3 Yohanes Amalan hidup dalam kebenaran.

Yudas Kemurtadan di gereja dikutuk.

Wahyu Kemenangan Allah atas segala kejahatan.

Nota:

Tema-tema yang bertentangan hanyalah satu panduan. Setiap tema ini tidak boleh dilihat sebagai tema tunggal kitab tersebut, tetapi hanyalah satu penekanan yang jelas dalam kitab tersebut.



Kunci Kebenaran

Setiap kitab dalam Alkitab mempunyai tema utama tersendiri. Senarai di atas hanyalah satu contoh dari beberapa tema ini.



Catatan Tambahan

Setiap kitab dalam Alkitab patut dibaca secara keseluruhan, supaya pembaca memahami sumbangannya bagi keseluruhan mesej Allah kepada manusia.



Kajian Alkitab Ulangan 4:32-40

Umat Israel bersiap sedia di sempadan Tanah yang Dijanjikan. 40 tahun pengembaraan bakal berakhir. Petikan ini adalah sebahagian daripada ucapan Musa tentang pengembaraan mereka bersama Allah – yang benar-benar adalah kisah Alkitab. Gunakan soalan-soalan berikut dalam pembelajaran anda:

1. Campur tangan Allah dalam kehidupan manusia bermula sejak penciptaan dunia (ayat 32). Apakah nilai melihat kembali jalan yang telah kita lalui?
2. "...suara Allah berfirman" (ayat 33). Apakah kebenaran hebat di sebalik ungkapan ini? Bandingkan dengan Ibrani 1:1-2.
3. Sejauh manakah keseluruhan mesej dari 66 kitab dalam Alkitab menyetujui dengan apa yang anda baca dalam ayat 34?
4. Cuba senaraikan pekerjaan Allah menurut petikan ini yang membuat umat-Nya mengakui kekuasaan Allah (ayat 35,39).
5. Ayat 40 menekankan perintah Allah harus dipatuhi. Bincangkan kitab-kitab dalam Alkitab yang pernah membantu anda secara signifikan.
6. Membaca Alkitab mungkin kelihatan sukar. Periksa dan fikirkan cara terbaik untuk mengatur program pembacaan Alkitab secara teratur.



Fikirkan

- A. Baca Matius 4:1-11. Pertimbangkan setiap godaan yang dilemparkan kepada Yesus. Kenapakah Dia menggunakan Perjanjian Lama begitu banyak untuk melawan iblis? Apa yang boleh kita pelajari daripada ini?
- B. Bincangkan bersama rakan-rakan anda kitab dalam Alkitab yang paling banyak membantu anda. Bagaimanakah ia membantu anda? Kitab manakah yang anda ingin baca seterusnya? Mengapa?
- C. Mengapa penting untuk kita membaca Alkitab? Rujuk 1 Yohanes 5:13 dan Yohanes 20:31.
- D. Mungkin anda merasa gentar dengan pemikiran untuk mengenal kitab-kitab dalam Alkitab. Apakah cara terbaik untuk merancang satu jadual pembacaan Alkitab?



Satu Renungan untuk Setiap Hari

Fokus kepada Alkitab: Bahagian Utamanya

<input type="radio"/> Allah yang suka memberkati	Kejadian 12:1-3
<input type="radio"/> Allah yang menuntut kesetiaan kita	Yosua 24:14-15
<input type="radio"/> Allah bagi setiap musim kehidupan	Pengkhotbah 3:1-8
<input type="radio"/> Allah yang membenci ketidakadilan	Amos 5:21-24
<input type="radio"/> Waktu untuk menerima berita baik	Markus 1:14-15
<input type="radio"/> Jangan menurut, berubahlah	Roma 12:1-2
<input type="radio"/> Yesus berkata, “Akulah Alfa dan Omega”	Wahyu 1:8-11

Fokus kepada Alkitab: Inspirasinya

<input type="radio"/> Identiti penulis ilahinya	1 Petrus 1:20-21
<input type="radio"/> Kepelbagaian penulis manusianya	Kisah Para Rasul 18:3
<input type="radio"/> Kesatuan temanya yang banyak	Matius 5:17-18
<input type="radio"/> Realiti impak moralnya	Ibrani 4:12
<input type="radio"/> Ideal untuk direnungkan	Yosua 1:7-8
<input type="radio"/> Seluruh Alkitab diilhamkan	2 Timotius 3:16
<input type="radio"/> Yesus berkata, “Ikutlah Aku”	Matius 4:19

Fokus kepada Alkitab: Tafsirannya


<input type="radio"/> Setiap bahagian harus dibaca berdasarkan latar sejarahnya	Yohanes 13:14
<input type="radio"/> Setiap bahagian haruslah konsisten dengan petikan di sekelilingnya	2 Korintus 4:2
<input type="radio"/> Setiap bahagian haruslah sesuai dengan seluruh Alkitab	Matius 22:29
<input type="radio"/> Setiap bahagian haruslah konsisten dengan matlamat wahyu Allah	Ulangan 29:29
<input type="radio"/> Setiap bahagian haruslah difahami berdasarkan perubahan budaya	Kisah Para Rasul 8:34-38
<input type="radio"/> Kesetiaan dalam tafsiran	Wahyu 22:18-19
<input type="radio"/> Yesus berkata, “Janganlah takut”	Matius 28:10

Fokus kepada Alkitab: Aplikasinya	
<input type="radio"/> Baca dengan berdoa	Mazmur 119:33-40
<input type="radio"/> Dengarlah secara pribadi	1 Samuel 3:10
<input type="radio"/> Lihat dengan harapan	1 Yohanes 5:13
<input type="radio"/> Terapkan secara teratur	Mazmur 11:1-2
<input type="radio"/> Bertindak dengan ketaatan	Yakobus 1:22-25
<input type="radio"/> Baca sepenuhnya	2 Korintus 4:2
<input type="radio"/> Yesus berkata, “Berimanlah kepada Allah”	Markus 11:22

Fokus kepada Alkitab: Tema Utamanya	
<input type="radio"/> Konflik yang berterusan	Kejadian 3
<input type="radio"/> Penyelamat yang dijanjikan	Yeremia 31:31-34
<input type="radio"/> Pekerjaan Kristus	Lukas 2:28-32
<input type="radio"/> Komuniti baru	Efesus 2:18-22
<input type="radio"/> Kemenangan muktamad	1 Tesalonika 4:13-18
<input type="radio"/> Ringkasan berguna	Titus 3:3-7
<input type="radio"/> Yesus berkata, “Dosa kamu telah diampunkan”	Lukas 7:48

Fokus kepada Alkitab: Isi Kandungannya	
<input type="radio"/> Rancangan Allah untuk umat-Nya	Kejadian 1:26-28
<input type="radio"/> Janji kebebasan	Yohanes 8:36
<input type="radio"/> Allah yang setia	Mazmur 36:5
<input type="radio"/> Allah yang adil	Ulangan 32:4
<input type="radio"/> Allah yang pengasih	1 Yohanes 4:10
<input type="radio"/> Yesus akan kembali untuk para pengikut-Nya	1 Tesalonika 4:16-17
<input type="radio"/> Yesus berkata, “Kitab Suci memberikan kesaksian tentang diri-Ku”	Yohanes 5:39





3

Y E S U S K R I S T U S



Yesus Kristus

1. Penjelmaan-Nya

Kristus Adalah Anak Allah Sebelum Masa dan Ruang

Alkitab mengajar bahawa kewujudan Yesus tidak bermula sewaktu Dia dilahirkan, tetapi Dia sentiasa wujud sebagai Anak Allah. Allah mencipta alam semesta melalui-Nya dan setiap yang wujud ada dalam-Nya.

Melalui Penghamilan Supranatural

Peristiwa kelahiran Yesus Kristus membantu kita memahami bahawa Dia dilahirkan tanpa dosa. Kecenderungan manusia untuk berdosa adalah warisan dari ibu bapa kita. Oleh kerana penghamilan yang unik tentang Yesus, Dia dilahirkan tanpa kecenderungan ini. Walaupun kelahiran Kristus sama seperti manusia biasa, penghamilan-Nya berlaku melalui pekerjaan Roh Kudus. Kerana itulah Yesus adalah Allah dan manusia.

Ia Menegaskan Keilahian Penuh Kristus

Keilahian Kristus didedahkan secara perlahan-lahan dalam Perjanjian Baru. Petunjuk itu menghalu kepada tiang tanda dan tiang tanda menghalu kepada pengisytiharan yang berani. Tiang tanda itu adalah: sifat Kristus (sifatnya yang tidak berdosa dan kemurniannya), dakwaan-Nya (Dia adalah pusat kebenaran, akan menjadi hakim dunia dan mempunyai hubungan unik dengan Bapa) serta kelakuan-Nya (melakukan keajaiban, mengampunkan dosa dan menerima penyembuhan).

Ia Mengukuhkan Kemanusiaan Kristus

Perjanjian Baru menunjukkan bahawa Kristus adalah manusia sepenuhnya yang dilahirkan dalam keluarga Ibrani dan tertakluk kepada hukum Yahudi. Dia mengalami semua masalah yang diharungi manusia. Dia merasai lapar, dahaga, keletihan dan kesedihan. Dia juga berdepan dengan godaan – namun tidak ditumpaskan. Walaupun Dia tetap Allah sepenuhnya, Yesus (sebagai manusia) berkongsi sepenuhnya semua kelemahan manusia. Kerana itulah Dia layak untuk menjadi

perantara yang unik, membawa kemanusiaan dan Allah bersama-sama.

Ia Menjelaskan Keperibadian Kristus yang Unik

Yesus Kristus tidak mempunyai persamaan kerana Dia adalah Allah dan manusia, dalam dua kudrat yang berbeza, dan satu peribadi untuk selama-lamanya. Yesus yang sama yang pernah berkata Dia dahaga, namun dalam doa Dia turut mengatakan kemuliaan yang dikongsi-Nya bersama Bapa. Penulis Perjanjian Baru tidak cuba untuk menjelaskan sebagai falsafah bagaimana satu peribadi dapat menjadi manusia dan ilahi. Tetapi potret yang mereka berikan mengidentifikasikan-Nya sebagai manusia dan Allah.

Ia Mengesahkan Pelayanan Penyelamatan Kristus

Terdapat aspek-aspek penjelmaan yang di luar pemahaman kita. Tetapi ada satu hal yang jelas. Memandangkan Yesus Kristus sememangnya Allah dan manusia, Dia adalah Penyelamat yang diperlukan umat manusia. Dengan meninggalkan keagungan abadi-Nya dan melibatkan diri dalam beban manusia – bahkan sampai mati di atas kayu salib demi dosa-dosa kita, Dia menjadi pendamai antara Allah dan manusia, dan dengan kebangkitan-Nya Dia membawa kemanusiaan kita ke syurga.



Rujukan Alkitab

Sebelum Masa:

Yohanes 1:1-3; Kolose 1:15-17

Supranatural:

Matius 1:18-25; 1 Petrus 2:22;
Ibrani 4:15

Menegaskan:

Yohanes 8:46,50-58; Lukas 5:20-21;
Yohanes 20:26-29

Mengukuhkan:

Galatia 4:4-5; Ibrani 2:14-18; 5:7

Menjelaskan:

Matius 8:24-27; Yohanes 19:28; 17:5

Mengesahkan:

1 Timotius 2:5; Filipi 2:5-11



Kunci Kebenaran

Istilah “penjelmaan” bermaksud “menjadi manusia”. Perjanjian Baru menyatakan Allah menjadi seorang manusia biasa. Peribadi ini iaitu Yesus Kristus, adalah Allah sepenuhnya dan manusia sepenuhnya.



Catatan Tambahan

Kesilapan telah timbul dalam sejarah Kristian setiap kali keilahian atau kemanusiaan Kristus diabaikan. Harus difahami bahawa dalam segala hal Yesus adalah sepenuhnya manusia dan sepenuhnya Allah.



Kajian Alkitab Kolose 1:15-20

Rasul Paulus menulis pada kira-kira tahun 55 Masihi, kepada jemaah Kristian di Kolose., sebuah kota yang terletak di Turki barat pada hari ini. Dia menulis dari penjara, untuk menentang ajaran sesat yang mempersoalkan keilahian Yesus Kristus. Soalan-soalan berikut akan membantu kita memahami petikan ini sambil memahami kudrat Kristus.

1. Petikan ini dipanggil “Pengakuan Keunggulan Kristus” (Handley Moule). Mengapakah ia dipanggil sedemikian berdasarkan ayat-ayat ini?
2. Cuba fahami hubungan Kristus dengan penciptaan. Kenapakah istilah “anak sulung” (atau “pewaris”, ayat 15) tidak membayangkan Kristus adalah makhluk yang diciptakan? Perhatikan dengan teliti ayat 15-17 dan bandingkan dengan Ibrani 1:2-3.
3. Seorang pelajar universiti pernah bertanya, “Adakah Yesus Kristus yang paling utama – atau adakah sesuatu yang lebih besar yang patut saya cari?” Petikan ini memberikan jawapan dan dia menjadi seorang Kristian. Apa yang ada dalam ayat-ayat ini yang telah membantunya?
4. Mengapakah kita boleh berkata bahawa Kristus adalah penjelasan dan tujuan seluruh alam semesta?
5. Ada segelintir orang yang berkata, “Mari cari ajaran terbaik dari semua tradisi dan gabungannya menjadi satu sintesis akhir yang muktamad.” Apakah jawapan kita kepada teori ini? Ayat 19 dan 20 mungkin membantu.
6. Jelaskan hubungan Yesus Kristus dengan gereja berdasarkan ayat 18. Di manakah satu-satunya tempat Allah akan bertemu dengan kita, dan di mana kita dapat menemui damai bersama-Nya? Apakah yang dikatakan oleh mesej ini yang kita boleh sampaikan kepada dunia?



Fikirkan

- A. Pertimbangkan Kolose 1:15-20. Bagaimanakah petikan ini menggambarkan Kristus dalam hubungannya dengan penciptaan, dengan gereja, dengan Allah dan dengan salib?
- B. Orang telah mempertikaikan hampir setiap aspek penjelmaan Kristus. Keilahian dan kemanusiaan-Nya yang sepenuhnya telah diserang secara khusus. Menurut pendapat anda, apakah sebabnya dan mengapakah pemahaman kita terbatas dalam ajaran ini?
- C. Bagaimanakah kita harus mencontohi kehidupan Yesus sebagai seorang manusia? Baca Ibrani 12:2-4 sebagai rujukan.
- D. Apakah manfaat mengetahui hakikat bahawa Yesus adalah manusia seperti kita? Dan apa yang kita dapati dari hakikat bahawa tidak seperti kita, Dia adalah Allah?



Yesus Kristus

2. Peristiwa Utama dalam Injil

Kelahiran-Nya yang Rendah Hati

Yesus dilahirkan semasa pemerintahan maharaja Romawi, Kaisar Augustus, dalam keluarga yang sangat miskin. Dia dilahirkan dalam persekitaran asing sewaktu banci Roma dilakukan. Dia juga berdepan bahaya selepas Dia dilahirkan kerana dicari oleh Raja Herodes untuk dibunuh. Kedua-dua elemen ini, kerendahan hati dan ketidakamanan kelahiran Yesus menetapkan pola seluruh hidup-Nya.

Pembaptisan-Nya yang Tanpa Dosa

Pembaptisan Yesus menandakan permulaan pelayanan-Nya. Yohanes Pembaptis menyeru para pendengarnya untuk melakukan pembaptisan pertaubatan. Namun, Yesus tidak mempunyai dosa yang Dia harus bertaubat. Tetapi dengan penyerahan-Nya kepada baptisan Yohanes, Dia menunjukkan diri-Nya memahami manusia yang berdosa. Roh Kudus yang turun seperti merpati dan kata-kata pengakuan dari Bapa yang menyusuli pembaptisan itu merupakan tanda persetujuan Allah terhadap pelayanan-Nya yang bakal dimulakan.

Godaan-Nya yang Berlanjutan

Sejurus selepas dibaptis, Yesus pergi ke gurun selama 40 hari untuk berpuasa. Di sana, Dia digoda oleh Iblis. Godaan itu datang sebagai cabaran kepada Yesus untuk mencari jalan pintas bagi misi-Nya. Yesus berjaya menepis godaan ini dan semua godaan lain sepanjang hidup-Nya.

Permuliaan-Nya yang Mengungkapkan

Menjelang akhir pelayanan-Nya, Yesus membawa tiga orang murid ke puncak bukit di mana Dia dipermuliakan menjadi bersinar-sinar di hadapan mereka. Musa dan Elia muncul dan berbicara dengan Yesus tentang cubaan yang menanti-Nya di Yerusalem. Murid-murid turut mendengar suara persetujuan ilahi dari syurga seperti pada pembaptisan Kristus. Peristiwa ini menunjukkan serba sedikit kemuliaan Yesus yang akan datang.

Kematian-Nya yang Taat

Keadaan berubah menentang Yesus selepas kemasukan-Nya ke Yerusalem. Jamuan Paskah yang dirayakan bersama murid-murid-Nya diikuti dengan pengkhianatan, perbicaraan tidak adil, kematian di kayu salib dan pengebumian-Nya. Ia adalah waktu yang gelap tetapi itulah tujuan Yesus datang ke dunia. Dia berkata Dia datang bukan hanya untuk mengajar dan menyembuhkan, tetapi juga untuk menderita dan mati bagi umat manusia.

Kebangkitan-Nya yang Menang

36 jam selepas dikebumikan, kubur Yesus didapati kosong. Hanya kain kafan-Nya yang tinggal. Itu sudah cukup bagi Yohanes yang “melihat dan percaya”. Selepas itu, Yesus mulai menampakkan diri-Nya di hadapan para pengikut-Nya selama 40 hari. Ini bukan ilusi kerana Dia makan, boleh disentuh dan dilihat oleh ratusan orang. Namun Dia unik dan berbeza kerana Dia menang atas kematian.

Kenaikan-Nya yang Mulia

Yesus dilihat buat kali terakhir oleh murid-murid-Nya di Bukit Zaitun. Dia memerintahkan mereka untuk menjadikan semua bangsa murid-Nya dan menjanjikan kurnia Roh Kudus yang akan memberi mereka kuasa untuk melakukan ini. Dia kemudian diangkat secara kelihatan. Dia tidak akan kelihatan lagi sehingga Dia kembali untuk kedua kalinya.



Rujukan Alkitab

Kelahiran:

Lukas 2:1-7; Matius 2:1-18;

Lukas 9:57-58

Pembaptisan:

Matius 3:13-17

Godaan:

Matius 4:1-11

Permuliaan:

Lukas 9:28-36

Kematian:

Matius 26 dan 27; Lukas 22:53

Kebangkitan:

Yohanes 20 dan 21; Lukas 24:36-43

Kenaikan:

Matius 28:16-20; Lukas 24:44-53



Kunci Kebenaran

Keempat Injil menyajikan pembaca dengan beberapa peristiwa penting dalam kehidupan Kristus. Semua peristiwa mempunyai signifikannya yang tersendiri.



Catatan Tambahan

Sangat bermanfaat untuk membandingkan kisah kehidupan Kristus dalam keempat Injil dan melihat bagaimana perbezaan pandangan para penulis saling melengkapi satu sama lain.



Kajian Alkitab Yohanes 2:1-11

Petikan ini menyusuli bab pertama Injil Yohanes yang mengajar tentang kedatangan Kristus sebagai Firman, sebagai kehidupan, sebagai cahaya dan sebagai Anak. Bab ini berakhir dengan nubuat Yesus bahawa syurga akan terbuka dan malaikat Allah naik dan turun ke atas Anak Manusia. Kita mungkin menjangka bab 2 akan membawa kita ke alam kemuliaan yang menakjubkan! Tetapi teruskan membaca:

1. Sebuah kampung kecil di wilayah Roma yang kecil – dengan krisis kecil di sebuah majlis perkahwinan. Mengapakah ini menjadi “tanda” pertama Yohanes tentang kemuliaan Kristus? Bincangkan.
2. Jika Maria, ibu Yesus, pernah mendengar kesaksian dalam bab 1 (misalnya ayat 49), dia mungkin bercakap dalam ayat 3 dengan mengharapkan Yesus akan menunjukkan waktu-Nya sebagai Mesias telah tiba. Apakah maksud balasan Yesus dalam ayat 4? Bandingkan Yohanes 17:1 dan Markus 14:41-42.
3. Baca ayat 5-10. Bagaimanakah ayat-ayat ini menggambarkan kebenaran bahawa melalui penjelmaan, Yesus memegang yang biasa, yang biasa menjadi lebih baik – dan yang terbaik bakal menjelang? Apakah tanda yang diberikan kepada murid-murid-Nya?
4. Apakah yang boleh kita pelajari tentang tujuan keajaiban – dari seorang yang enggan mengubah batu menjadi roti bagi diri-Nya dan enggan melakukan keajaiban bagi kepentingan Herodes? Ayat 11 mungkin memberikan petunjuk.
5. Tidak semua orang mendapat maksudnya. Pengerusi majlis hanya boleh bercanda dengan pengantin lelaki. “Kamu simpan air anggur yang terbaik sampai akhir!” Kenapa ini berlaku?
6. Baca ayat 11 sekali lagi. Renungkan perkara yang menyusul: perjalanan, keajaiban, permuliaan dan salib. Apakah yang ingin dicapai oleh pernyataan “kemuliaan” Yesus yang pertama ini?



Fikirkan

- A. Baca Yohanes 17:1-5. Apa sebenarnya “kerja” yang diberikan kepada Kristus? Bagaimanakah peristiwa penting dalam hidup-Nya menyumbang ke arah itu?
- B. Dari apa yang kita tahu, bagaimanakah Yesus mempersiapkan diri-Nya untuk pekerjaan utama-Nya? Bagaimanakah Dia mempersiapkan murid-murid-Nya?
- C. Yesus Kristus tidak mempunyai rumah sendiri, tidak pernah menjelajah di luar Palestin atau menulis buku. Jadi, bagaimanakah Dia memberi impak kepada dunia?
- D. “Kalaulah Kristus ada di bumi pada hari ini.” Apakah reaksi anda setiap kali ungkapan ini dikatakan? Rujuk Yohanes 16:5-7.



Yesus Kristus

3. Aspek Utama Pelayanan-Nya

Kuasa yang Meyakinkan

Kewibawaan Yesus sewaktu mengajar mengagumkan para pendengar-Nya. Nabi-nabi dahulu sering berkata, “Allah berfirman ...” Tetapi Kristus sering berkata “Aku berkata kepada kamu...” Dia menghalakan para pendengar kepada diri-Nya sendiri. Para pemimpin Yahudi pada zaman Yesus mendapat wibawa mereka daripada guru mereka, tetapi Kristus mengajar dengan nama dan kuasa-Nya sendiri.

Perumpamaan yang Memprovokasi

Pengajaran Yesus Kristus disampaikan dengan istilah dan gambaran kehidupan seharian, terutamanya melalui perumpamaan yang tidak dapat dilupakan, yang menyembunyikan dan mengungkapkan kebenaran. Orang ramai sering tertarik dengan kisah Anak yang Hilang atau Orang Kaya yang Bodoh, kemudian menyedari perumpamaan itu merujuk kepada diri mereka.

Mukjizat yang Mengesahkan

Kuasa Kristus dibuktikan oleh mukjizat-mukjizat-Nya. Badai dan ombak patuh kepada perintah-Nya, malah orang yang mati turut dibangkitkan kembali. Tetapi kebanyakan mukjizat-Nya adalah penyembuhan yang merupakan sebahagian daripada misi kasih-Nya. Mereka turut menunjuk identiti-Nya sebagai Anak Allah dan kedatangan kerajaan Allah.

Belas Kasihan yang Menarik Perhatian

Keprihatinan mendalam Kristus terhadap manusia berasal dari pemahaman-Nya bahawa manusia diciptakan dalam imej Allah, tetapi kita juga jatuh dan hidup dalam dunia yang jatuh. Oleh itu Kristus menunjukkan kepedulian dan keprihatinan terhadap manusia.

Ini dapat dilihat dalam banyak pertemuan-Nya dengan orang yang berdukacita, yang sakit dan yang dirasuk iblis. Orang ramai cepat mengenali nilai tinggi yang Yesus letakkan kepada individu-individu dan mereka datang berjumpa-Nya secara beramai-ramai.

Latihan yang Menyediakan

Menjelang awal tahun kedua pelayanan Yesus, 12 orang murid telah dipilih untuk berkongsi dalam pekerjaan-Nya untuk mengajar, berkhotbah dan menyembuhkan. Mereka belajar dari teladan Kristus dan dari arahan peribadi yang diberikan-Nya kepada mereka. Dia turut melatih mereka untuk pekerjaan masa hadapan mereka ketika mereka (bersama 70 orang yang lain) diutus berduka-duka untuk melakukan pekerjaan-Nya. Kedua belas orang murid tidak mengerti semua yang diajarkan pada waktu itu, tetapi latihan mereka amat penting dalam perkembangan gereja.

Kontroversi yang Mencabar

Sejak awal kata-kata dan tindakan Yesus mempunyai kecenderungan yang kontroversi dan akhirnya menimbulkan perselisihan antara diri-Nya dengan pihak berkuasa Yahudi. Yesus berselisih dengan para pemimpin Yahudi tentang isu-isu berikut: bahawa Dia bergaul dengan orang berdosa, mencabar tradisi, melanggar Sabat dan mendakwa diri-Nya Allah.



Rujukan Alkitab

Kuasa:

Matius 5:21-22,27-28,31-34; 7:24-29

Perumpamaan:

Markus 4:2; Matius 13:10-17;

Lukas 15:11-32

Mukjizat:

Markus 1:23-28; Yohanes 10:31-33

Belas Kasihan:

Matius 9:35-38; 15:32-39;

Yohanes 11:30-44

Latihan:

Matius 10:1-15; 16:13-21;

1 Yohanes 1:1-4

Kontroversi:

Markus 2:5-7,15, 16;

Matius 23:13-36; 26:62-66



Kunci Kebenaran

Kristus tidak seperti nabi atau guru agama lain yang pernah hidup. Dengan wibawa dan perbuatan-Nya, dengan kuasa ajaran-Nya dan teladan-Nya, Dia mencabar para pendengar-Nya untuk percaya kepada-Nya sebagai Anak Allah yang unik.



Catatan Tambahan

Adalah fakta yang luar biasa bahawa walaupun Yesus mengarahkan para pendengar kepada diri-Nya sendiri, Dia tidak pernah memberi kesan angkuh, bongkak atau mementingkan diri.



Kajian Alkitab Matius 5:1-16

Walaupun ada ramai orang di sekeliling Yesus, tetapi pada dasarnya Dia menyampaikan Khutbah Di Atas Bukit kepada “para pengikut-Nya.” Yesus berkhotbah, tetapi Dia juga melukis potret orang percaya yang ideal. Dia turut merancang satu misi dengan mengajar dalam hal “garam” dan “cahaya”. Soalan-soalan berikut akan membantu anda memahami betapa radikalnya cabaran Kristus.

1. Baca ayat 1-12 untuk memahami bagaimana nilai-nilai kerajaan Kristus secara langsung bertentangan dengan masyarakat.
2. Ada yang mengkritik Khutbah Di Atas Bukit sukar difahami. Menurut anda, adakah ia ditulis untuk orang ‘biasa’? Berapa berbezakah ahli masyarakat baru Kristus?
3. Dalam ayat 3-10, adakah ini sikap lapan orang yang berbeza atau sifat seorang peribadi? Bandingkan jawapan anda dengan Galatia 5:22-23.
4. Semua kualiti yang dibincangkan adalah kualiti dalaman. Mengapa?
5. Jika anda berada dalam satu kumpulan, setiap ahli harus “menerima” satu nilai dan cuba menjelaskannya berdasarkan pemahaman Alkitab. Bagaimanakah kita akan mengenalinya pada hari ini?
6. Apakah yang dapat dipelajari dari ayat 11 dan 12 tentang penganiayaan orang percaya - penyebabnya, sejarahnya dan reaksi kita yang betul?
7. Ayat 13-16 menampilkan dua gambaran luaran yang orang Kristian patut berikan kepada masyarakat. Terapkannya dalam persekutuan dan gereja anda. Berdoalah untuk itu.



Fikirkan

- A. Pertimbangkan pengajaran Yesus dalam Matius 5:1-12. Bagaimanakah Dia menterbalikkan nilai-nilai dunia? Cuba senaraikan berkat yang menjadi milik ahli kerajaan Kristus.
- B. Bagaimanakah seorang Kristian boleh mengamalkan sikap Yesus kepada orang lain? Bagaimanakah ini boleh diterapkan di kawasan anda sendiri?
- C. Orang Kristian sejati tidak dapat mengelakkan kontroversi. Isu apakah yang perlu dihadapi pada hari ini atas nama Kristus?
- D. Apakah perumpamaan Yesus yang telah berbicara kepada anda baru-baru ini? Bincangkannya bersama rakan-rakan.



Yesus Kristus

4. Nama-Nya

Anak Allah

Tidak seperti guru lain, Yesus mengajar murid-murid-Nya untuk memikirkan Allah sebagai Bapa mereka. Tetapi cara-Nya menggunakan istilah “Bapa-Ku” dan “Bapamu” menunjukkan hubungan-Nya kepada Allah Bapa adalah berbeza dari hubungan para pengikut-Nya. Pihak berkuasa Yahudi mengenali ini dan menuduh Yesus sebagai menyamakan diri-Nya dengan Allah. Perkataan “Anak Allah” muncul paling kerap dalam Injil Yohanes.

Firman

Perjanjian Lama memberitahu kita bahawa Allah mencipta segalanya dengan firman-Nya. Dia berfirman dan itu terjadi. Rasul Yohanes menunjukkan bahawa firman ini adalah Anak Allah, yang tanpa-Nya tiada yang akan wujud. Firman ini juga terlibat dalam penciptaan Allah dengan cara penting yang lain. Dia adalah ungkapan paling sempurna Allah kepada manusia. Kerana Kristus adalah Firman, Dia tidak sekadar menyampaikan berita baik Allah, tetapi Dialah berita baik itu.

Imam Besar

Gelaran ini diberikan kepada Kristus dalam Surat Ibrani, diambil dari sistem korban Perjanjian Lama. Satu korban harus dilakukan setiap tahun oleh Imam Besar bagi pihak umat Allah untuk menebus dosa-dosa mereka. Kristus, melalui kematian pengorbanan-Nya (yang tidak pernah diulangi) adalah pengantara dan Imam Besar yang paling sempurna.

Mesias

Selama berabad-abad orang Yahudi menantikan seorang raja dari keturunan Daud. Dia disebut “Mesias” oleh orang Yahudi (juga disebut Christos dalam bahasa Yunani, asal bagi terjemahan nama “Kristus”). Dia akan memiliki kewibawaan dan kuasa Allah untuk membawa akhir zaman dan mendirikan kerajaan Allah.

Simon Petrus adalah orang pertama yang membuat pengisytiharan jelas bahawa Yesus adalah Kristus, tetapi penting untuk diperhatikan bahawa Yesus menolak anggapan popular Mesias adalah penyelamat politik Yahudi dari Empayar Roma. Dia melihat peranan-Nya sebagai Mesias adalah untuk menderita dan mati bagi penyelamatan manusia.

Anak Manusia

Yesus paling kerap menggunakan gelaran ini untuk diri-Nya. Walaupun ia merujuk kepada kemanusiaan-Nya, ia turut menunjukkan keilahian-Nya kerana gelaran ini berasal dari kitab Daniel yang menyatakan Anak Manusia memerintah kerajaan abadi.

Yesus menggunakan gelaran ini dalam tiga cara – sewaktu bercakap tentang pelayanan-Nya di bumi, kematian-Nya dan kemuliaan-Nya yang akan datang. Dia mungkin menggunakan gelaran ini kerana ia tidak berkaitan dengan perjuangan nasional, tetapi menyiratkan pengenalan diri dengan umat manusia, dan mempunyai kedua-dua “nada kemanusiaan dan keilahian”.

Tuhan

Dalam Perjanjian Baru, memanggil Yesus sebagai “Tuhan” adalah tanda orang Kristian sebenar. Menggunakan gelaran ini mengundang tentangan – dari pihak berkuasa Yahudi atas dasar penghujatan, dan dari pihak berkuasa Romawi atas dasar pengkhianatan terhadap Maharaja. Ini adalah nama yang menganggap semua kuasa sebagai milik Yesus.



Rujukan Alkitab

Anak Allah:

Yohanes 20:17; 5:18,25; 20:31

Firman:

Mazmur 33:6-9; Yohanes 1:1-4,14;

Wahyu 19:11-13

Imam Besar:

Imamat 9:7-8; Ibrani 7:23-28

Mesias:

Matius 16:16,21; Yohanes 4:25-26

Anak Manusia:

Matius 8:19-20; 20:17-19; 24:30;

Daniel 7:9-14

Tuhan:

1 Korintus 12:1-3; Yohanes 13:13;

Filipi 2:9-11



Kunci Kebenaran

Gelaran-gelaran Yesus Kristus yang berlainan mengungkapkan sifat-sifat khas peribadi dan pekerjaan-Nya.



Catatan Tambahan

Kepenuhan Kristus tidak mampu difahami akal dan pemahaman manusia. Enam gelaran yang disenaraikan di sini bukanlah senarai lengkap dari Alkitab. Kita pasti merasa terdorong jika menyenaraikan semua gelaran lain yang diberikan kepada Yesus.



Kajian Alkitab Wahyu 19:6-16

Kitab ini ditulis kira-kira tahun 96 Masihi, ketika Maharaja Domitianus menzalimi empayar Roma. Kitab ini mendorong orang percaya, “orang salih Allah” di sepanjang zaman terutamanya sewaktu berdepan tekanan dan tentangan. Ia menggambarkan kemenangan Kristus, walaupun perkara mencabar yang dihadapi umat-Nya. Dalam penulisan futuristik ini, Rasul Yohanes yang sendirian di pembuangan, menceritakan kejatuhan dunia kejahatan. Kristus digambarkan melalui imej jelas dan pelbagai gelaran. Semoga anda terdorong!

1. Dalam ayat 6-10, pemerintahan Allah digambarkan sebagai yang tertinggi di tengah pengakuan dan pujian umat-Nya. Apakah erti penting perayaan yang digambarkan ini?
2. “Anak Domba” ini juga adalah mempelai lelaki bagi pengantin perempuannya, gereja. Apa yang istimewa dengan Anak Domba ini? Bandingkan Wahyu 12:11.
3. “Yesus” (ayat 10). Bilakah nama itu mula-mula menjadi penting dan dihargai dalam kumpulan anda? Renungkan keluarga orang percaya di seluruh dunia yang “bersaksi tentang Yesus.”
4. Penglihatan ini berubah pada ayat 11. “Putih” sering merujuk kepada kekudusan dan syurga dalam kitab Wahyu. Fikirkan implikasi mengikuti Penunggang kuda putih ini (misalnya ayat 14; rujuk juga ayat 8)
5. Perhatikan “nama-nama” khusus dalam ayat 11-16. Terdapat empat nama (ayat 11, 12, 13, 16). Apakah yang boleh dipelajari tentang Kristus daripada keempat-empat “nama” ini? Apakah peringatan yang perlu kita ketahui? Dengan cara apakah nama yang tidak dikenali dalam ayat 12 memperingatkan kita?
6. Luangkan masa untuk menyembah dan berdoa, terapkan pengajaran ini dan nama-nama Kristus yang lain semasa anda berdoa.



Fikirkan

- A. Baca Matius 16:13-28. Yesus memuji Petrus kerana mengenali-Nya sebagai Mesias, tetapi menghalang dia daripada mendedahkannya kepada orang ramai. Mengapa? Apakah gambaran lain bagi Yesus dalam petikan ini? Bagaimanakah Yesus melihat peranan-Nya?
- B. Mengapakah Kristus lebih tinggi dari keimamatan Perjanjian Lama? Baca Ibrani 7:23-28.
- C. Mengapa kita peduli tentang gelaran bagi Yesus Kristus? Apakah bahaya pada hari ini dengan hanya menyebut Dia “Yesus”? Bandingkan jawapan anda dengan Markus 13:5-6.
- D. Gelaran Yesus Kristus yang mana satukah amat bermakna bagi anda? Apakah aspek baru tentang diri-Nya yang anda baru fahami dalam pembelajaran ini?



5. Kematian Penebusan-Nya

KEMATIAN KRISTUS...

Memulakan Hubungan Baru

Alkitab mengajar bahawa dosa manusia telah mencipta satu penghalang antara dia dan Penciptanya. Namun, Yesus menerima tanggungjawab untuk dosa manusia dan secara sukarela mengambil hukuman itu di kayu salib. Alkitab memanggilnya sebagai pendamaian – Yesus menjadi korban untuk memalingkan murka Allah. Satu hubungan baru kini tersedia bagi mereka yang menerima berita baik bahawa dosa mereka boleh diampunkan.

Permusuhan telah digantikan dengan persahabatan. Mereka yang menjadi satu dengan Kristus kini dipandang oleh Allah seolah-olah mereka tidak pernah memberontak sama sekali. Sesungguhnya orang Kristian dilihat sebagai orang yang baru.

Menggenapi Perjanjian Lama

Perjanjian Lama menunjukkan bahawa Allah dan manusia tidak dapat didamaikan kecuali satu korban dilakukan. Hanya dengan itu kesalahan dosa dapat dihapuskan.

Pengorbanan haiwan dalam Perjanjian Lama tidak mampu menghapuskan atau menjadi penyelesaian bagi masalah dosa. Perjanjian Baru menganggapnya sebagai gambaran bagi korban sempurna yang dilakukan Yesus.

Memusnahkan Kerajaan Iblis

Kuasa kerajaan Iblis dihancurkan melalui kematian dan kebangkitan Yesus Kristus. Pemusnahan terakhir Iblis belum terjadi lagi. Orang Kristian menyedari kegiatan dan pengaruhnya – tetapi yakin akan kemenangan dan perlindungan melalui kuasa salib.

Menterbalikkan Kekuasaan Dosa

Dalam Alkitab, idea menebus (atau membeli semula) seseorang yang diperhambakan sangat kuat. Kristus disajikan sebagai Penebus umat-Nya daripada hukuman hukum moral Allah melalui kematian-Nya. Oleh kerana Kristus telah mengambil kesalahan kita atas diri-Nya sendiri, dosa tidak lagi mempunyai kuasa untuk menguasai kehidupan orang Kristian.

Menyediakan Jalan Kemenangan

Dengan kuasa iblis dihadkan (serta dihancurkan kemudian) dan dosa telah dihapuskan, salib Yesus Kristus telah membebaskan orang Kristian. Orang Kristian tidak bebas dari perjuangan kesucian moral – tetapi dibebaskan untuk bertarung. Berikut adalah penjelasan bagi penyelamatan: kita telah diselamatkan dari hukuman dosa oleh Penyelamat yang disalibkan, kita diselamatkan dari kuasa dosa oleh Penyelamat yang hidup; kita akan diselamatkan dari kehadiran dosa oleh Penyelamat yang akan datang. Bermula dari salib, kita telah menang.

Dijamin Selamanya dengan Allah

Salib adalah jaminan bahawa Allah memberikan kasih-Nya yang abadi kepada umat-Nya; tiada yang lebih jelas daripada kematian Anak-Nya. Kematian masih menjadi musuh, tetapi musuh ini telah dikalahkan oleh kematian dan kebangkitan Kristus. Seperti Iblis, kematian turut akan dihapuskan. Salib menjamin orang Kristian tentang warisan yang dijanjikan dalam kerajaan kekal Allah.



Rujukan Alkitab

Dimulakan:

2 Korintus 5:15-19; Roma 5:8-11

Digenapi:

Ibrani 10:1-12; Yesaya 53:4-12

Dihapuskan:

Kolose 2:15; 1 Yohanes 3:8

Diterbalikkan:

Galatia 3:13; Roma 6:6-11

Disediakan:

1 Yohanes 1:7-9; Titus 2:14

Dijamin:

Roma 8:31-39; Ibrani 2:14-15



Kunci Kebenaran

Istilah “menebus” bermaksud menyatukan. Dengan mati bagi dosa dunia, Yesus Kristus membuka jalan bagi manusia untuk “disatukan” bersama Allah.



Catatan Tambahan

Sebahagian besar dari keempat Injil menceritakan tentang kematian Kristus. Penyaliban-Nya bukanlah satu kejadian tragik tetapi peristiwa utama bagi kehidupan Kristus.



Kajian Alkitab Matius 27:32-56

Ini adalah satu petikan yang ditulis oleh seorang saksi, tanpa kiasan bahasa, namun penuh ironi kerana memenuhi nubuat Perjanjian Lama. Ini adalah satu kematian di tempat awam, diperhatikan oleh para askar (ayat 36), ditonton oleh orang yang lalu-lalang (ayat 39), oleh hierarki keagamaan (ayat 41) dan disaksikan oleh ketua tentera serta ramai wanita (ayat 54 dan 55). Ketika membaca petikan ini, renungkan persoalan peribadi ini, “Adakah anda berada di sana, sewaktu mereka menyalibkan Tuhan saya?”

1. Minta setiap ahli kumpulan untuk menyebut satu mesej utama petikan ini kemudian bandingkan jawapan anda.
2. “Simon” (ayat 32) ialah ayah kepada Aleksander dan Rufus, menurut Markus 15:21. Adakah ini bermaksud sewaktu Injil ini ditulis, mereka berdua telah dikenali sebagai orang Kristian? Roma 16:13 mencadangkan inilah hakikatnya. Renungkan kesan kayu salib itu kepada Simon.
3. Minta seorang ahli kumpulan untuk membaca Mazmur 22:1,7-8,14-18 kemudian bincangkan pengaruh mazmur ini kepada Matius 27.
4. “Kalau Engkau Anak Allah” (ayat 40,43). Bilakah Yesus pernah mendengar kata-kata ini? Baca Matius 4:5 – adakah itu cabaran yang sama untuk menepis penyeksaan kayu salib? Apakah ironi ayat 42? Bandingkan ayat 40 dengan ayat 54.
5. Teruskan pembacaan tentang kematian Yesus kemudian renungkan ayat 51-53, “bumi digegar gempa” (Alfred Edersheim). Apakah jaminan yang diberikan peristiwa ini kepada kita (bandingkan Keluaran 26:33 dengan Ibrani 10:19-22)? Apakah kesan kayu salib kepada kematian? Rujuk 2 Timotius 1:10. Sila luangkan masa untuk doa dan penyembahan.



Fikirkan

- A. Baca Matius 27:32-54. Renungkan kematian Kristus dari segi penggenapan Perjanjian Lama (sebagai contohnya Mazmur 22).
- B. Sebelum Dia mati, Yesus berteriak, “Sudah selesai!” – Yohanes 19:30. Apakah maksud perkataan ini? Selepas memikirkannya, baca Yohanes 12:27 dan 17:4.
- C. Apakah respons terbaik seorang Kristian bagi pengorbanan Yesus Kristus?
- D. Dalam 1 Korintus 1:18-25, kita mendapati mesej kayu salib menyinggung ramai orang. Apakah sebabnya?



6. Kebangkitan Kemenangan-Nya

Asas Kepercayaan Kristian

Kebangkitan Yesus Kristus mengangkat agama Kristian dari tahap falsafah, atau semata-mata kod etika, kepada berita baik Allah bagi umat manusia.

Dalam kebangkitan itu, Allah menetapkan Kristus sebagai Anak Allah dan menggariskan nilai kematian-Nya. Kebangkitan itulah yang mengubah pengikut Kristus dan menghantar mereka ke seluruh dunia untuk menyampaikan berita baik. Kebangkitan adalah pusat iman Kristian.

Peristiwa yang Disokong oleh Bukti

Jika kita mencari bukti kebangkitan, kita dihadapkan terlebih dahulu berdepan bukti fakta. Terdapat sebuah kubur kosong yang hanya berisi kain kafan yang ditinggalkan, dan kegagalan yang berterusan dari semua penjelasan selain daripada Kristus telah bangkit. Kita juga berhadapan dengan laporan Yesus dilihat banyak kali, pada waktu yang berlainan dan kepada orang yang berbeza.

Terdapat juga bukti psikologi. Sebagai contoh, ada murid-murid yang telah berubah, keyakinan gereja awal dalam menghadapi penganiayaan serta perubahan dari hari Sabtu ke hari Ahad sebagai hari beribadah bagi orang Kristian (selepas berabad-abad ibadah Sabat).

Janji Kemenangan Muktamad

Jika Kristus tidak bangkit dari kubur, kematian-Nya adalah bukti kukuh tentang kegagalan misi-Nya. Oleh itu, kebangkitan memberikan jaminan positif bahawa orang percaya Kristian tidak percaya dengan sia-sia. Misi Yesus tidak berakhir dengan kegagalan tetapi dengan kemenangan. Segala-galanya, termasuklah “musuh terakhir”, iaitu kematian itu sendiri, harus tunduk kepada kemenangan dan pemerintahan Yesus.

Kuasa Pengalaman Kristian

Bagi orang Kristian, kebangkitan Kristus bukan sekadar satu peristiwa dalam sejarah. Ia memainkan peranan penting dalam kehidupan seharian orang Kristian pada masa kini dan mewarnakan pandangan, harapan dan motif setiap orang percaya.

Perjanjian Baru mengajar kita bahawa orang Kristian harus bersedia untuk menjadi seperti Yesus Kristus dalam hidup dan matinya. Ini bermakna bahawa kerana kita telah mati kepada kepentingan diri (seperti kematian Yesus), maka kita menjalani kehidupan baru (seperti kebangkitan Yesus). Orang Kristian hidup dan bekerja dalam kuasa yang membangkitkan Yesus daripada kematian.

Jaminan Keselamatan Kekal

Kemenangan Kristus ke atas kematian membuat perubahan besar kepada kedukaan dan perkabungan. Kematian tidak lagi muktamad. Orang yang mati turut mengetahui Kristus pernah melalui pengalaman ini dan akan membawa mereka mengharunginya. Tambahan lagi, memandangkan tubuh Kristus turut dibangkitkan, kita juga akan menerima tubuh yang baru dan kuat. Tubuh baru ini dikaitkan dengan yang lama namun tanpa kelemahan dan kemerosotan.



Rujukan Alkitab

Asas Iman:

1 Korintus 15:12-19; Roma 1:4

Peristiwa:

Yohanes 20:1-29; 1 Korintus 15:1-8

Janji:

1 Korintus 15:24-28;

Kisah Para Rasul 17:30-31

Kuasa:

Filipi 3:10-11; Roma 6:5-14

Jaminan:

Yohanes 11:25-26;

1 Korintus 15:20,42-57



Kunci Kebenaran

Alkitab mengatakan bahawa Allah membangkitkan Kristus dari antara orang mati. Dengan melakukan itu, Allah mengisytiharkan Anak-Nya adalah Penyelamat dunia. Peristiwa kebangkitan adalah asas Kekristianan.



Catatan Tambahan

Perlu diingatkan bahawa Yesus tidak akan bangkit dengan penuh kemenangan sekiranya Dia tidak sanggup mengorbankan nyawa-Nya. Kita hanya menerima kehidupan baru Allah apabila kita berserah sepenuhnya kepada-Nya.



Kajian Alkitab 1 Korintus 15:1-11

Agama Kristian mengalu-alukan setiap percubaan untuk menyiasat dan “menafikan” kebangkitan Yesus Kristus. Selalunya, cubaan ini meyakinkan pengkritik bahawa ia memang benar. Dalam bab ini, Paulus menjelaskan mesej utama injil apostolik. Soalan-soalan berikut akan membantu anda untuk memahami petikan yang dipilih.

1. Dari ayat 1 dan 2, betapa pentingkah kebenaran yang ditulis Paulus?
2. Dalam ayat 3-5, Paulus menjelaskan asas kepercayaan seluruh gereja. Kenal pasti empat peristiwa yang disenaraikan dalam ayat-ayat ini. Apa yang signifikan mengenai fakta semua empat peristiwa yang disebut dalam satu ayat?
3. Tetap dengan ayat 3-5. Bagaimanakah mereka menjawab teori yang mengatakan Kristus hanya bangkit secara rohani? Apakah kepentingan frasa seperti “dia dikuburkan, “pada hari ketiga” dan “sebagaimana tersurat dalam Kitab Suci”?
4. Bagaimanakah ayat 5-8 menjelaskan hipotesis yang mengatakan orang Kristian awal mungkin mengalami halusinasi?
5. Paulus menulis tentang pertaubatan dan pekerjaannya dalam menyebarkan injil (ayat 9-11). Apakah kepentingan empat kata nama dalam ayat 11 – “Aku”, “mereka”, “kita”, “kamu”? Kenapakah kita tidak patut berpuas hati dengan tafsiran Alkitab yang bercanggahan? Apakah pengaruh kepercayaan tentang kebangkitan tubuh Yesus Kristus kepada:
 - (a) pandangan peribadi anda tentang masa hadapan dan
 - (b) gaya hidup anda ketika ini?



Fikirkan

- A. Pertimbangkan 1 Korintus 15:1-11. Apakah inti utama injil yang disampaikan oleh Paulus? Cuba senaraikan bukti kebangkitan yang diketengahkan oleh Paulus, termasuklah pertaubatannya.
- B. Apakah pengaruh mesej kebangkitan Kristus kepada pandangan anda tentang kematian dan masa hadapan?
- C. Berdasarkan bukti yang tersedia, apakah tubuh yang dimiliki Yesus sewaktu Dia muncul kepada murid-Nya selepas dibangkitkan? Baca Lukas 24:39-43.
- D. Baca Galatia 2:20. Apakah maksudnya, secara praktikal?



Satu Renungan untuk Setiap Hari

Fokus kepada Yesus: Penjelmaan-Nya	
<input type="radio"/> Kristus adalah Anak Allah sebelum masa dan ruang	Yohanes 1:1-3
<input type="radio"/> Melalui penghamilan supranatural	Matius 1:18-25
<input type="radio"/> Ia menegaskan keilahian Kristus	Yohanes 8:46
<input type="radio"/> Ia mengukuhkan kemanusiaan Kristus	Galatia 4:4-5
<input type="radio"/> Ia menjelaskan keperibadian Kristus yang unik	Matius 8:24-27
<input type="radio"/> Ia mengesahkan pelayanan penyelamatan Kristus	1 Timotius 2:5
<input type="radio"/> Yesus berkata, “Pada hari ini juga engkau akan bersama-Ku dalam Firdaus.”	Lukas 23:43

Fokus kepada Yesus: Peristiwa Utama Injil	
<input type="radio"/> Kelahiran-Nya yang rendah hati	Lukas 2:1-7
<input type="radio"/> Pembaptisan-Nya yang tanpa dosa	Matius 3:13-17
<input type="radio"/> Pemuliaan-Nya yang mengungkapkan	Lukas 9:28-36
<input type="radio"/> Kematian-Nya yang taat	Lukas 23:26-43
<input type="radio"/> Kebangkitan-Nya yang menang	Lukas 24:1-8
<input type="radio"/> Kenaikan-Nya yang mulia	Lukas 24:44-53
<input type="radio"/> Yesus berkata, “Percayalah kepada Allah”	Yohanes 14:1

Fokus kepada Yesus: Aspek Utama Pelayanan-Nya	
<input type="radio"/> Kuasa yang meyakinkan	Matius 5:21-22,27-28
<input type="radio"/> Perumpamaan yang memprovokasi	Markus 4:2
<input type="radio"/> Mukjizat yang mengesahkan	Markus 1:23-28
<input type="radio"/> Belas kasihan yang menarik perhatian	Matius 9:35-38
<input type="radio"/> Latihan yang menyediakan	Matius 10:1-15
<input type="radio"/> Kontroversi yang mencabar	Markus 2:5-7
<input type="radio"/> Yesus berkata, “Percayalah juga kepada-Ku”	Yohanes 14:1

Fokus kepada Yesus: Nama-Nya	
<input type="radio"/> Anak Allah	Yohanes 20:17
<input type="radio"/> Firman	Wahyu 19:11-13
<input type="radio"/> Imam Besar	Ibrani 7:23-28
<input type="radio"/> Mesias	Yohanes 4:25-26
<input type="radio"/> Anak Manusia	Matius 8:19-20
<input type="radio"/> Tuhan	1 Korintus 12:1-3
<input type="radio"/> Yesus berkata, “Kamu ialah garam dunia.”	Matius 5:13

Fokus kepada Yesus: Kematian Penebusan-Nya	
<input type="radio"/> Memulakan hubungan baru	2 Korintus 5:15-19
<input type="radio"/> Menggenapi Perjanjian Lama	Yesaya 53:4-12
<input type="radio"/> Memusnahkan Kerajaan Iblis	1 Yohanes 3:8
<input type="radio"/> Menterbalikkan kekuasaan dosa	Galatia 3:13
<input type="radio"/> Menyediakan jalan kemenangan	1 Yohanes 1:7
<input type="radio"/> Dijamin selamanya dengan Allah	Roma 8:31-39
<input type="radio"/> Yesus berkata, “Akulah roti hidup itu”	Yohanes 6:35

Fokus kepada Yesus: Kebangkitan Kemenangan-Nya	
<input type="radio"/> Asas kepercayaan Kristian	Roma 1:4
<input type="radio"/> Peristiwa yang disokong oleh bukti	Yohanes 20:1-29
<input type="radio"/> Janji kemenangan muktamad	1 Korintus 15:24-28
<input type="radio"/> Kuasa pengalaman Kristian	Roma 6:5-14
<input type="radio"/> Jaminan keselamatan kekal	Yohanes 11:25-26
<input type="radio"/> Lebih banyak bukti!	1 Korintus 15:1-11
<input type="radio"/> Yesus berkata, “Akulah cahaya dunia.”	Yohanes 8:12